

SIARAN MEDIA MENTERI KEWANGAN MALAYSIA YB TUAN LIM GUAN ENG



Kerajaan persekutuan akan menyegerakan proses perolehan dan perbelanjaan sehingga RM350 juta untuk fasa 1 projek membaik pulih sekolah daif di Sarawak

KERAJAAN PERSEKUTUAN AKAN MENYEGERAKAN PROSES PEROLEHAN DAN PERBELANJAAN SEHINGGA RM350 JUTA UNTUK FASA 1 PROJEK MEMBAIK PULIH SEKOLAH DAIF DI SARAWAK SEBAIK SAHAJA KERAJAAN NEGERI SARAWAK MEMBUAT BAYARAN BALIK HUTANG SEBANYAK RM350 JUTA

Kerajaan Persekutuan akan menyegerakan proses perolehan dan perbelanjaan sehingga RM350 juta untuk Fasa Pertama projek membaik pulih sekolah daif di Sarawak sebaik sahaja Kerajaan Negeri Sarawak membuat bayaran balik hutang sebanyak RM350 juta. Pada 30 Jun 2019, Kerajaan Negeri Sarawak masih berhutang dengan Kerajaan Persekutuan sebanyak RM2,352 juta. Sekiranya RM1 bilion tersebut dibayar balik oleh Kerajaan Negeri Sarawak, maka Kerajaan Negeri Sarawak masih berhutang kepada Kerajaan Persekutuan sebanyak RM1,352 juta.

Kerajaan Persekutuan telah bersetuju secara dasarnya untuk menerima sebahagian daripada bayaran balik pinjaman hutang Kerajaan Negeri Sarawak sebanyak RM1 bilion kepada Kerajaan Persekutuan untuk diperuntukkan bagi membaik pulih sekolah daif, tertakluk kepada mekanisme perundangan yang ditetapkan, iaitu:

Pertama, Kerajaan Negeri Sarawak hendaklah membayar balik sehingga RM1 bilion daripada jumlah hutangnya kepada Kerajaan Persekutuan ke dalam Kumpulan Wang Disatukan Kerajaan Persekutuan. Ini adalah selaras dengan penetapan undang-undang dan Perlembagaan Persekutuan Malaysia.

Kedua, Kerajaan Persekutuan akan menyalurkan jumlah sama seperti yang dibayar balik oleh Kerajaan Negeri Sarawak sebagai peruntukan untuk digunakan bagi projek membaik pulih sekolah daif di Sarawak.

Ketiga, kerja membaik pulih sekolah daif di Sarawak hendaklah ditawarkan secara tender terbuka, bagi memastikan ketelusan dan nilai berpatutan (*value for money*) berdasarkan tatacara kewangan Kerajaan Persekutuan semasa.

Keempat, Kerajaan Persekutuan bersedia mengambil kira keutamaan Kerajaan Negeri Sarawak dalam menentukan sekolah daif untuk dibaik pulih.

Keempat-empat kriteria ini telah dipersetujui oleh Kerajaan Negeri Sarawak dalam surat YAB Ketua Menteri Sarawak kepada saya yang diterima pada 15 Julai 2019. Kementerian Kewangan ingin menjelaskan bahawa cadangan Kerajaan Negeri Sarawak menggunakan bayaran balik pinjaman untuk membaik pulih sekolah daif, sebenarnya adalah wang pendahuluan Kerajaan Persekutuan kerana melibatkan penggunaan dana yang dipinjamkan kepada Kerajaan Negeri Sarawak sebelum ini. Sebagai bayaran balik pinjaman kepada Kerajaan Persekutuan, ianya bermaksud dana RM1 bilion tersebut sebenarnya merupakan wang milik Kerajaan Persekutuan sendiri, yang dipersetujui untuk digunakan bagi membaik pulih sekolah daif di Sarawak.

YAB Ketua Menteri Sarawak menyatakan kesediaan untuk menyalurkan bayaran balik pinjaman fasa pertama sebanyak RM350 juta dalam tempoh terdekat. Selepas itu, beberapa perkara harus dimuktamadkan, di antaranya jadual pelaksanaan, senarai sekolah dan proses tender bagi projek tersebut. Dengan semangat kerjasama dan niat ikhlas semua pihak, Kementerian Kewangan yakin bahawa proses tender bagi fasa pertama projek membaik pulih sekolah daif di Sarawak ini akan dilaksanakan sebelum hujung tahun 2019.

Sayangi Malaysiaku!

Lim Guan Eng

Menteri Kewangan
Kementerian Kewangan Malaysia
Putrajaya
22 Julai 2019

[Tweet](#)

[Like](#)

Be the first of your friends to like this.